

CONVENIO DE COLABORACIÓN ENTRE O SERVIZO GALEGO DE SAÚDE, A AXENCIA GALEGA PARA A XESTIÓN DO COÑECEMENTO EN SAÚDE (ACIS) E A FUNDACIÓN INSTITUTO DE INVESTIGACIÓN SANITARIA DE SANTIAGO DE COMPOSTELA, PARA A XESTIÓN DO PROXECTO DE INVESTIGACIÓN “*Diagnosis and Management of Febrile Illness using RNA Personalised Molecular Signature Diagnosis*” (DIAMONDS)

En Santiago de Compostela, a 28 de maio de 2020.

REUNIDOS

Dunha parte, Don Jesús Vázquez Almuiña, conselleiro de Sanidade da Xunta de Galicia e presidente do Servizo Galego de Saúde, organismo autónomo adscrito á devandita consellería, actuando en nome e representación deste último e tamén na súa condición de Presidente da Axencia Galega para a Xestión do Coñecemento en Saúde (ACIS), de conformidade co establecido no artigo 34 da Lei 1/1983, do 22 de febreiro, reguladora da Xunta e do seu Presidente, modificada por Lei 11/1998 do 20 de outubro; co Decreto 43/2013, do 21 de febreiro, polo que se establece a estrutura orgánica do Servizo Galego de Saúde; co artigo 11.2.a) do Decreto 112/2015, do 13 de xullo, polo que se crea a citada Axencia e se aproban os seus estatutos, e co establecido na Lei 1/2016, do 18 de xaneiro, de transparencia e bo goberno de Galicia, así como na Lei 40/2015, do 1 de outubro, de Réxime Xurídico do Sector Público.

E doutra parte, Dona Eloína Núñez Masid, en calidade de Presidenta do Padroado da Fundación Instituto de Investigación Sanitaria de Santiago de Compostela (FIDIS), constituída con data 3 de maio de 2001 e clasificada de Interese Sanitario e Interese Galego e inscrita no Rexistro Único de Fundacións de Interese Galego co rexistro 2001/1 O. Domicilio social: Travesía da Choupana s/n. 15706, Santiago e CIF G15796683.

As Partes, con plena capacidade para convir en nome das entidades que representan e en función dos seus respectivos cargos

EXPOÑEN

1. Que o presente convenio ten por obxecto promover a posta en marcha do proxecto “*Diagnosis and Management of Febrile Illness using RNA Personalised Molecular Signature Diagnosis*” (DIAMONDS), no ámbito hospitalario e de atención primaria de saúde na Área Sanitaria de Santiago de Compostela e Barbanza.

2. Que o Servizo Galego de Saúde incorpora como un dos elementos fundamentais da súa actividade a investigación e a innovación biomédica. Así, a Estratexia Sergas 2020 establece como unha das súas liñas estratéxicas impulsar a xestión do coñecemento e a investigación, a través de innovacións organizacionais, con liderado en investigación, atracción de financiamento para investigación e aproveitamento de coñecementos particulares para a mellora común do sistema. Ademais, outro dos obxectivos é promover a participación dos profesionais en iniciativas e proxectos de ámbito internacional, polo que o proxecto citado ten pleno encaixe na citada estratexia.

Por outra banda, a Lei 8/2008, do 10 de xullo, de Saúde de Galicia, establece no artigo 32 que un dos principios reitores do Sistema Público de Saúde de Galicia é a promoción da investigación básica e clínica no eido das ciencias da saúde, cun carácter traslacional á práctica clínica. Asemade, o artigo 94 f) da citada Lei establece como unha das funcións do Servizo Galego de Saúde a promoción da docencia e a investigación en ciencias da saúde no ámbito dos centros, servizos e establecementos sanitarios asistenciais.

3. Que o artigo 34 da Lei 14/2011, do 1 de xuño, da Ciencia, a Tecnoloxía e a Innovación, prevé que os axentes e organismos públicos de investigación, poidan subscribir convenios de colaboración entre si ou con axentes (nacionais, supranacionais ou estranxeiros) que realicen actividades de investigación científica e técnica, para a realización conxunta de proxectos e actuacións de investigación científica, desenvolvemento e innovación; creación ou financiamento de centros, institutos e unidades de investigación; financiamento de proxectos científico-técnicos singulares; formación de persoal científico e técnico; divulgación científica e tecnolóxica; ou uso compartido de inmobles, de instalacións e de medios materiais para o desenvolvemento de actividades de investigación científica, desenvolvemento e innovación. Por outra banda, a citada lei, no seu artigo 35, establece que as Administracións públicas, no ámbito das súas respectivas competencias, fomentarán a valorización, a protección e a transferencia do coñecemento co obxecto de que os resultados da investigación sexan transferidos á sociedade.

4. Que a Fundación Instituto de Investigación Sanitaria de Santiago de Compostela (en adiante, FIDIS) é unha Fundación de interese galego en conformidade coa Lei 12/2006, con personalidade xurídica propia e sen ánimo de lucro que ten como obxectivo a realización de actividades de promoción, prestación e xestión de recursos e servizos de docencia e investigación científica, nos centros sanitarios do Sistema Público de Saúde de Galicia.

5. Que a Axencia de Coñecemento en Saúde (ACIS) é unha axencia pública creada por Decreto 112/2015 do 31 de xullo, e ten competencias na coordinación e planificación da investigación, na formación, avaliación de tecnoloxías e innovación sanitaria.

6. Que as Partes están interesadas en favorecer o desenvolvemento de proxectos de investigación financiados pola Comisión Europea para o que desenvolveron accións de promoción comúns.

7. Que as partes participan no proxecto colaborativo *“Diagnosis and Management of Febrile Illness using RNA Personalised Molecular Signature Diagnosis”* (en diante, proxecto DIAMONDS) como parte do Horizonte 2020 – Programa Marco de Investigación e Innovación da Unión Europea para o período 2014-2020, do que é investigador principal o Dr. Federico Martinón Torres. O proxecto pretende abordar o desafío de levar a medicina personalizada a un uso rutineiro nos sistemas sanitarios da UE, para o diagnóstico e tratamento de enfermidades infecciosas e inflamatorias comúns. (Anexo I).

Para poder desenvolver correctamente o proxecto é necesario que parte das accións do proxecto se desenvolva en contacto directo con pacientes pediátricos a través das consultas e dos servizos de urxencias. O persoal que se empregue para o proxecto terá que ter ademais dun perfil investigador as competencias asistenciais para atender pacientes, informar sobre o proxecto e promover a participación no mesmo do maior número posible de pacientes. Por tanto é necesario que o persoal investigador que se empregue para o proxecto DIAMONDS poida realizar gardas de urxencia.

Con data 6 de decembro de 2019 asinouse o acordo de subvención (Grant Agreement) con número 848196 (Anexo I), no que se recolle que a entidade beneficiaria do proxecto é o Servizo Galego de Saúde e a FIDIS participa como terceira parte vinculada para a xestión económica dos fondos. Do total de 22.582.021,13 euros concedidos a o consorcio, o Servizo Galego de Saúde é beneficiario de 1.000.000,00 euros, e a FIDIS, como terceira parte vinculada ao SERGAS, é receptor de 1.400.000,00 euros

8. Que, co fin de potenciar o desenvolvemento de Programas de I+D+i no entorno sanitario galego, as partes interviñentes consideran oportuno apoiar a posta en marcha e execución do proxecto indicado, como parte integrante da liña de colaboración estable que se remonta ao convenio asinado o 18 de xullo de 2007, tendo en conta ademais que a experiencia participativa desenvolta ten resultado altamente satisfactorio, tanto pola formación e experiencia dos profesionais implicados nesta materia, coma pola colaboración establecida neste ámbito.

Esta circunstancia xustifica o carácter excepcional e de interese público das accións a desenvolver, como servizo esencial para a comunidade, para promover a realización de proxectos de investigación sanitaria no Sistema Público de Saúde.

De conformidade cos antecedentes expresados, as Partes acordan subscribir o presente convenio

de colaboración (en diante, o "Convenio"), de conformidade cos termos e condicións establecidas nas seguintes.

CLÁUSULAS

Primeira.- OBXECTO DO ACORDO.

Constitúe o obxecto do presente Convenio a colaboración entre as Partes, concretando todas as actuacións, medios e recursos necesarios para o correcto desenvolvemento do proxecto DIAMONDS, cuxas condicións se detallan no documento anexo a este convenio, e que forma parte integrante do mesmo.

De conformidade coa Lei 1/2016, do 18 de xaneiro, de transparencia e bo goberno de Galicia, coa Lei 19/2013, de 9 de decembro, de transparencia, acceso á información pública e bo goberno, e co previsto no Decreto 132/2006, de 27 de xullo, polo que se regulan os rexistros públicos creados nos arts 44 e 45 da Lei 7/2005, de 29 de decembro, de presupostos xerais da Comunidade Autónoma de Galicia para o ano 2006, a sinatura do presente convenio suporá o consentimento expreso á Administración Autonómica, para incluír e facer públicos os datos referidos ao presente acordo nos Rexistros de Convenios da Xunta de Galicia, polo que o Servizo Galego de Saúde dará publicidade deste acordo de conformidade co que establecen as disposicións aplicables na materia.

Segunda.- DESCRICIÓN DAS ACTUACIÓNS.

As actuacións comprendidas neste Convenio son as seguintes:

1. Incorporación de investigadores. Dotar con fondos do proxecto DIAMONDS a cobertura desde o Complexo Hospitalario Universitario de Santiago de un máximo de tres (3) especialistas en Pediatría para a realización de labores de investigación relacionadas co Proxecto DIAMONDS. O desenvolvemento e execución do proxecto, tendo en conta a súa natureza e contido, exige que os citados especialistas poidan desenvolver actividades tamén mediante a súa presenza física en gardas na Área de Pediatría. A dotación dos postos responderá á modalidade contractual de acordo coa normativa que lle resulte de aplicación.

A FIDIS achegará para tal fin a cantidade de 40.000 euros anuais por cada un dos/as especialistas contratados.

2. Intensificación de investigadores. No caso de ser necesario, a cobertura financeira de proxecto

abranguerá os fondos precisos para asegurar a debida cobertura das necesidades de recursos humanos para atender e manter os axeitados niveis asistenciais no cento hospitalario de referencia, de xeito que os investigadores implicados no proxecto poidan desenvolver adecuadamente as tarefas que a execución do proxecto esixe. Para tal fin, a FIDIS alcanzará para un importe de 30.000 euros para o persoal facultativo e de 15.000 euros para o persoal de enfermería por cada investigador ou investigadora que teña dedicación intensiva, que corresponde a unha liberación do 50% do seu tempo asistencial.

Terceira.- ACHEGAS ECONÓMICAS.

Como consecuencia do acordo de subvención (Grant Agreement) 848196 (Anexo I), no que se recolle que a entidade beneficiaria do proxecto é o Servizo Galego de Saúde, e que a FIDIS participa como terceira parte vinculada para a xestión económica dos fondos, do total 22.582.021,13 euros concedidos ao consorcio, o Servizo Galego de Saúde é beneficiario de 937.500,00 euros, e a FIDIS, como terceira parte vinculada ao SERGAS, é receptor de 1.462.500,00 euros.

Os fondos do proxecto DIAMONDS serán achegados en cada anualidade desde a FIDIS á conta que designe o Servizo Galego de Saúde.

Este Convenio non supón gasto ningún para a Consellería de Sanidade nin para o Servizo Galego de Saúde. As Partes facilitarán as tarefas de xustificación dos fondos que serán coordinadas pola FIDIS.

Cuarta.- CLÁUSULA DE CONFIDENCIALIDADE E PROTECCIÓN DE DATOS.

De conformidade co establecido na Lei Orgánica 3/2018, de 5 de decembro, de Protección de Datos Persoais e Garantía dos Dereitos Dixitais, ademais do resto de lexislación vixente nesta materia, as partes comprométense a gardar a máis estrita confidencialidade respecto de calquera das informacións, datos e documentación de carácter persoal a que teñan acceso en virtude do presente convenio e ao deber de gardalos, sen que poidan utilizalas para usos diferentes aos previstos no mesmo, e fan constar, de maneira expresa, que velarán polo cumprimento da normativa de protección de datos persoais de aplicación en cada caso. Estas abrigas subsistirán mesmo despois de finalizar as relacións entre as partes.

Quinta.- SEGUIMIENTO E COORDINACIÓN DE ACTIVIDADES.

Nomearase unha Comisión de Seguimento, composta por representantes das tres entidades:

1. A Xerente da Área Sanitaria de Santiago de Compostela e Barbanza, ou persoa que lle substitúa.

1. A directora da FIDIS, ou persoa que lle substitúa.
2. O director da Área de Planificación e Promoción da Investigación da Axencia Galega para a Xestión do Coñecemento en Saúde, ou persoa que lle substitúa.

A esta comisión corresponderanlle as seguintes funcións:

1. O seguimento do proxecto DIAMONDS no relativo ao presente Convenio.
1. Resolver dúbidas de interpretación e discrepancias que poidan xurdir durante a execución.

Sexta.- VIXENCIA, DURACIÓN E MODIFICACIÓN.

O presente Convenio entrará en vigor ao día seguinte da súa firma, e terá unha duración de cinco (5) anos computados a partir daquela.

Este Convenio poderase resolver anticipadamente por:

- a) A vontade de calquera das partes, que se instrumentará por escrito cun preaviso mínimo de tres meses.
- a) A imposibilidade sobrevinda, legal ou material, de desenvolver as actividades que constitúen o seu obxecto.
- b) O incumprimento manifesto, por calquera das partes, das cláusulas do presente Convenio.
- c) As reestruturacións funcionais en calquera das institucións asinantes do Convenio que fagan inviable o seu cumprimento.
- d) A finalización das causas que motivan a subscripción do acordo.

A modificación das previsións contidas neste Convenio, así como a súa resolución anticipada, poderá realizarse mediante acordo das Partes. Se durante o desenvolvemento do Proxecto se producisen circunstancias que implicasen modificacións substanciais do presente acordo, as Partes documentarano por escrito mediante a sinatura dunha addenda ao presente convenio.

Sétima.- NATUREZA XURÍDICA.

O presente acordo ten natureza administrativa e rexerase polas súas cláusulas, pola Lei 40/2015, do 1 de outubro, de réxime xurídico do sector público, e pola lexislación sobre a materia obxecto do mesmo.

De conformidade co disposto no artigo 6.2 da Lei 9/2017, do 8 de novembro, de Contratos do Sector Público, pola que se trasponen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, o

presente acordo de colaboración está excluído do ámbito de aplicación desta lei. Non obstante, aplicaranse os principios desta para resolver as dúbidas e lagoas que puideran presentarse, de acordo co sinalado no artigo 4 do citado texto legal.

Oitava.- XURISDICIÓN.

O presente convenio ten natureza administrativa. As dúbidas que se poidan suscitar sobre a súa interpretación resolveranse de mutuo acordo entre as partes pola comisión de seguimento. Non obstante, en caso de persistencia do desacordo corresponderá á xurisdición contencioso-administrativa resolver as cuestións litixiosas que poidan xurdir da súa interpretación e cumprimento.

E en proba de conformidade, as Partes asinan o presente documento, por triplicado exemplar, no día e lugar consignados no seu encabezamento.

Polo Servizo Galego de Saúde

Pola Fundación Instituto de Investigación
Sanitaria de Santiago

Jesús Vázquez Almuiña

Eloína Núñez Masid

Anexo I, Acordo de Subvención (Grant Agreement) núm. 848196, e memoria do Proxecto DIAMONDS anexada ao mesmo.